

Dangj Cungjsuhgi Daengz Mbanjcuengh

党总书记到壮乡

□ Cinz Siengzcouh / 覃祥周

Namzguk seizdoeng raejrubrub,
Cien duj valup hai hoengzmaeq;
Dangj cungjsuhgi daengz Guengjsae,
Byaraemx ndeimaex(vuenheij) riu mbouj duenh.

Byasang diuq foux diuqyoekyoek,
Raemxhaij laefoed laecangcang;
Lwgminz ciengq go ok sing sang,
Docih cunghyangh soengq fuk daeuj.

2023 caen vuenheij,
Mbanjcuengh daihdeih fwen lairaeuh;
Dangj cungjsuhgi soengq raeuj daeuj,
Baihna j yied gaeuj(yawj) loh yied gvangq.

De ngamq dauqok Yeznanz ma,
Sikhaek dinga dieb Mbanjcuengh;
Guengjsae duh raeuz caen miz muengh,
Gyoengqraeuz beixnuengx angqvauvau.

Gwnz bya vacwx hoengzlili,
Dangj cungjsuhgi daeuj daengz ranz;
Sai mbwk laux coz duj sim van,
Bouxboux ok ranz daeuj angqcoux.

De youq gaujcaz ndawde gangj,
Gaijfang swhsiengj bae guh saeh;
Cauxmoq gouz bienq yaengj lai ndei,
Yiengq haij guh bae giengz fazcanj.

Haenqrengz bae sij bien faenzcieng,
Yiengh yendaiva Cungguk raeuz;
Guengjsae yied ngoenz yied lai gyaau,
Haeuj neix baenaj daih mizmuengh.

Cibngeih nyied ngoenz cibsam hauh,
Dauqok Yeznanz daengz ndaw guk;
Nyaengq gij saehcingz buek youh buek,
Nyengh roengz Diegcuengh ma yawjngonz.

Ngoenz cibseiq hauh cibhaj hauh,
De vunz bouxlau mbouj lau baeg;
Haeuj daengz Namzningz Laizbinh dieg,
Max mbouj dingz gieg(din) guh diuyenz.

Cungguk Dunghmungz Sinsizgangj,
Dwg camh daih'it de yawjngonz;
Soujsien dingq gij veibau gonq,
Yienzhaeuh gangj son hawj gyoengqvunz.

Cungguk Dunghmungz Sinsizgangj,
Guh hangh hong neix cungyau hung;
"It rangh it loh" guh doengzgungh,
Raeuz caeuq Dunghmungz ndaej doxdoeng.

Guengjsae guhsaeh aeu cujdung(cawjdoengh),
Fazveih cozyung gij ceiqliemj(cihdenj);
Guh sinsizva aeu gyagiengz,
Daezsang gij yiengh guh hailangh.

Docih dangj daeuj gyaq giuzgim,
Hawj raeuz hwnjdin yamq baenaj;
Gak cuz beixnuengx mbaq deb mbaq,
Hwngvuengh Cunghvaz miz maqmuengh.

Gyawj bya cij rox roeg ciengq go,
Gyawj raemx cij rox bya fad giz(fwed);
Haeuj daengz ndaw naz caeuq ndaw rih(reih),

Dangj cungjsuhgi cei q yinghmingz.

Daeuj daengz Namzningz Liengzging Gih,
Gangj aen vwndiz hawj raeuz nyi;
Cunghvaz Minzcuz gungdungzdij,
Yaek daj segih guh hwnjbae.

Ganbu ginzcong ndaej gujvuj,
Buxbux(bouxboux) ndaw sim raeuj lumj feiz;
Sigloux giet naed got itheij,
Fazcanj roengzbae yaek yungh goeng.

Beixnuengx doengz gungh youq lajmbwn,
Doengz guh hong gwn doengh naz ndeu;
Vunzlai doengz ndoet diuz dah heu,
Bouxboux doengz heux guh mbanjranz.

Dangj cungjsuhgi gyaez bouxminz,
Gangj vah ndaw sim raeuz dungx raeuj;
Gyaunde i Guengjsae baengh fwndou,
Loqsiengj duh raeuz baenz dahraix.

Duzroeg gyaez ndoeng bya gyaez raemx,
Bouxdaeuz ndaw saem(sim) gyaez lwgminz;
Gyaauj reih gyaauj naz louz rizdin,
Caeuq lauxbeksingq gangj hongliengz.

Laizbinh dieg neix miz oij lai,
Hawj gou sim hai angqyangzyangz;
Fazcanj gwzgiz lai guh dangz,
Cungqvunz angqyangz miz maqmuengh.

Cuknyienh ndaw mbanj gyoengq beixnuengx,
Gwndaenj mbouj ruengx caez angqyangz;
Ndwenggoenz lumj oij van lumj dangz,
Yienghyiengh hwnj sang bae baihnaj.

Doicaenh Guengjsae dangzyez(guhdangz saeh-
nieb) raeuz,
Fazcanj dingh aeu gauh cizlieng;
Souj ndei "guenqdangz" vunz lajbiengz,
Gyoengqsou ciengzciengz dawz rap naek.

Caenndang byaij haeuj daengz dangzcanj,
De miz vah gangj hawj gyoengqraeuz;
Dangj cungjsuhgi youh caiq naeuz,
Youhsi canjyez yaek guh ak.

Aeu go oij ndeu roengzdaeuj dawz,
Saedyienh "gwn hawq youh caq caenh";
Gij fu' gyahciz sang lai faenh,
Guh baenz guh haenq gij canjyez.

Guekgya cihciz gij hong sou,
Sou aeu ca ndei gienh saeh neix;
Cien gya fanh hoh cungj vuenheij,
Baengh sou soengq bae gij dangzvan.

Maqmuengh daihgya cungj roengzrengz,
Ceng'aeu hagsib gisuz moq;
Mboujduenh caijyungh gunghyi moq,
Sim oq fazcanj gij dangzyez.

Daezsang cizlieng gyangq cingzbonj,
Caenhliengh gemj sonj(sonjsaet) lai miz rengz;
Mboujduenh iet gvangq canjyezlen,
Hawj vunz baenz benq ndaej souhaeuj.

Dingq cungjsuhgi gangj vah moq,
Daezsang swnghhoz vunz ndaw mbanj;
Coicaenh guh dangz bae fazcanj,
Ndaem oij hix canh ngaenz cienfanh.

Duzguk baengh bya roeg baengh ndoeng,
Beksingq couh baengh dangj daiq ndei;
Lajmbanj hwngvuengh guh hwnjbae,
Saenzcou daihdeih yienghyiengh hoengh.

Gwn raemx mbouj lumz boux vat cingj,
Hingfuz(vuenyungz) mbouj lumz aen dangj raeuz;
Seizneix ndwenngoenz gvaq mbouj you,
It dingh mbouj lumz boux yinxloh.

Lai ndaem va nywj sim vuenheij,
Lai ndaem gofaex roeg heuh angq;
Dingq cungjsuhgi dawz vah gangj,
Bouxboux sim sangj miz goenggrengz.

Fagcax yied muz couh yied raeh,
Ringeiz yied cat yied rongh lai;
Haeujlaeg hagsib Ngeihcib Daih,
Raeuz couh lailai miz saenqsim.

Beijfwen ciengq hawj cungjsuhgi,
Sim vansisi uk ronghsingj;
Mbouj lumz simnduj caeuq sawjmingh,
Raeuz dingh guh hingz Guengjsae moq.

Gingqgyaez bouxdaeuz cungjsuhgi,
Caenndang daengz giz Mbanjcuengh daeuj;
Ngoenz guh fanh saeh vih gyoengqdou,
Bouxboux ndaw sim gig gamjdoengh.

Docih dangj raeuz cungjsuhgi,
Miz siusik ndei cienz gya'gyawj;
Ok guk dauqma couh daeuj yawj,
Dawz gij raeuj dangj hawj gyoengqraeuz.

Bimoq daeuj daengz miz saenheiq,
Mbanjcuengh daihdeih gizgiz raeuj;
Geiq ndei gij vah bouxdaeuz raeuz,
Yied ngoenz yied daeuj hwnj mbaek sang.

Ndaem va cix gyaez ndaem mauxdan,
Danz gimz couh gyaez bizbaz gim;
Gij vah bouxdaeuz geiq coq sim,
Couh raen rongh gim youq baihnaj.

Ndaw ndoeng duzroeg gyaez duzfungh,
Bya nyauh gyaez lungz youq ndaw haij;
Giendingh mbouj bienq riengz dangj byaij,
Bouxboux gaiqgaiq guh ndaej baenz.

Dangj raeuz sonyinx bengz gvaq gim,
Miz aen miz cingz youq Mbanjcuengh;
Bimoq daeuj daengz gyoengq beixnuegx,
Cuengq sing ciengq go danqhaenh dangj.

Ndaw ndoeng bibi cungj miz rangz,
Namzgva bibi cungj maj go;
Bimoq daeuj daengz heiqliengq moq,
Riengz boux hai dox bongh baenaj.

Va bungz seizcin va hai hoengz,
Gwnzbiengz daih'onj gyaez ciengq go;
Yamq hung byaij haeuj seizdaih moq,
Nditndongq ciuq doh Mbanjcuenggh raeuz.